

INUIT ATAQATIGIIT

INATSISARTUNI



UPA 2014/121.1
Naaja H. Nathanielsen

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarneranik Inatsisartut inatsisaat nr. xx, xx 2014-imeersoq

(Aningaasaqarnermut Nunamullu Namminermut Naalakkersuisoq)

Inuit Ataqatigiit isumaqarpugut inatsisissatut siunnersuut manna akuerineqartinnagu allanngortinneqartariaqartoq. Taamaammatt Aningaasaqarnermut Akileraartarnermullu suliarisassanngortillugu makkuninnga oqaaseqaatitalerlugu ingerlateqqippaput:

Ajuusaarnarlunnarpoq inatsisissatut siunnersuut tamanit takuneqarsinnaanngorlugu pisortat tusarniaaviannut ikkunneqarsimanngimmat. Inatsisissatut siunnersuut "teknikkikkut" pissuseqarnerarlugu taamaammallu nutseruminaatsuunerarlugu Naalakkersuisut tunngavilersuipput.

Inuit Ataqatigiit isumaqarpugut oqaatsit arlariit atorlugit suliarisimaneqaqqaartinnagu inatsisissatut siunnersuut sunaluunniit tusarniaassutigineqanngilluinnartassasoq. Taamaammatt tunngavilersuutigineqartoq akuerisinnaanngilarput. Inatsisissatut siunnersuutit "teknikkikkut atuaruminaatsut" ukiuni aggersuni amerliartortussaapput, taamaammatt tamat oqartussaqaataaneratt innarlerneqassaaq inatsisissatut siunnersuutit suliarilluarneqartarnissaannut, aammalu paasisaasumik kalaallisut nutserneqartarnissaannut kiisalu inatsisissatut siunnersuutit assigiinngitsut internetimut tamanut ammasumik iliorarneqartarnissaannut Namminersorlutik Oqartussat piffissaq atortariaqartoq atorlugu sulisanngippata. Ilaannikkooriarluni pitsaanerusarpoq piffissaq atortariaqartoq atorlugu sulissalluni suliarlu aallaqqaataanit peqqissaarullugu ingerlatissallugu.

Namineerluni nalunaarsuutip kingusinaartumik tunniunneqartillugu pineqaatissiilluni akiliutigittinneqartartoq Naalakkersuisut allanngortikkusupput. Siunnersuut taanna Naalakkersuisut qaqitaat imaasiinnarlugu Inuit Ataqatigiit tungaannit ilalersinnaanngilarput. Isumaqarpugut allaffissornikkut pisaarsersuutaaginassasoq. Taarsiullugu siunnersuutigerusupparput ullut aalajangersimasut qaangiunnerisigut aalajangersimasumik annertussuseqartumik akiliuteqartitsisarneq aallartinneqartalissasoq. Inuit Ataqatigiit isumaqarpugut ulluni qulini imaluunniit ulluni 25-ni ullormut 200 koruuninik akiliisitsisarneq piffissaq eqqorlugu inuit amerlanerusut tunniussisalernerannik kinguneqarnavianngitsoq. Taamaasiortalissagaanni qularnanngilluinnartumik sulisut suliamiit suliamut akileeqqussisutit qanoq annertussusilersorneqartarnissaat ullullu qassit qimmuussimanersut naatsorsorlugu piffissaajaatigalissavaat – taamaasiernerit pisortat suliassaqarfiutaanni suliakkersorneqareeqisumi piffissamik nukinnillu asiutitsinerinnaassapput.

Naalakkersuisut aamma innuttaasut akileraarutit pillugit paasisutissaataanik nunanik allanik paarlaasseqatigiittalerusupput. Immikkut taaneqarpoq tamanna pillugu USA-mik isumaqatigiissusiornissaq maanna ingerlanneqartoq, kisianni inatsisini tunngavissaq amigaataavoq.

Akileraarutissanik minnaariniartoqartarnissaa pitsaaliorniarlugu nunat assigiinngitsut pisortaasa suleqatigiinnerisa pitsaasortaqaarnera Inuit Ataqatigiit paasisinnaavarput. Kisianni ilanngullugu qularnaartussaavarput innuttaasut inatsisitigut isumannaatsuunissaat innarlerneqassanngimmat aammalu paasisutissat qanoq ittut qanorlu siunertaqartumik paarlaasseqatigiittoqartassanersoq erseqqilluinnartumik aalajangersarneqassammat. Taamaammatt suliap matuma tungaatiqut nalunaatsumik paasinarluartumillu inatsiseqarnissap pisariaqassusia pillugu ataatsimititaliaq inassavarput sissuingaaqqullugu.